

東

華

續

錄

東華續錄

臣 王先謙

臣 周潤蕃恭校

嘉慶十四年己巳春正月辛酉朔 上以五旬萬壽頒詔天下覃
恩有差○封儀親王永璇子貝子縣志成親王永理孫貝子奕綸
爲貝勒○封科爾沁貝子鄂勒哲依圖爲貝勒○加慶桂董誥太
子太師戴衢亨太子少師鄒炳泰王懿修明亮太子少保○癸亥
西安將軍德楞額奏有疾晉封三等公命其子蘇沖阿馳往省視○
乙丑諭軍機大臣等本日據吳璫托津會同鐵保等奏籌議南河
經費一摺據稱查鹽斤一項乃民間日用所必需而每口日食不
過三錢請於見行鹽價每斤酌加三釐統計兩淮長蘆山東河東
兩浙兩廣福建陝西甘肅九處約計每年共可得銀四百餘萬兩

似與民生無損而經費少充實於要工有裨等語河防關繫漕運
民生時塵宵旰遇有應辦各工原不惜多費帑金爲一勞永逸之
計惟是近年以來河患頻仍如海口運口及高堰隄壩等處要工
層見疊出需用浩繁國家經費有常豈能盡供工用勢不得不設
法調劑茲據吳璥等奏請酌加鹽價以備工需朕思鹽斤一項雖
出之於民而與加賦少異似於閭閻生計不至大礙但各省情形
亦有不同自難一槩而論卽如兩淮地方濱臨河岸小民無不藉
資保衛則將官鹽量爲加增諒所樂從其兩浙山東與江境毗連
且每年漕運亦所必經誼難漠視他如長蘆河東以及閩粵陝甘
等省相距較遠於河防利害實無關涉若槩令按照加價徵課事
理殊覺未協著各該督撫鹽政體察情形如以爲事尚可行不必
拘定吳璥等酌加三釐之數或就原額量增一二釐准其暫行售

實儻實有礙難辦理之處亦不妨據實奏聞惟當悉心籌議俟奏到時再降諭旨○諭伯麟奏接到緬甸四大萬頭目來文飭令永昌鎮府駁回緣由一摺所辦甚是邊徼地方設有定界斷無天朝外夷均相管轄之理該督以該大萬此次稟帖所開九龍江地方原是天朝與該國所管之地實不成話仍與台布蘇漢字稟帖相同且既稱九龍江又稱簡雍紀顯係藉詞影射該督已代該鎮府等擬作照會並以該大萬稟內既稱不敢將前次照會稟知該國王則該大萬此次僭越冒稟在天朝鎮府等亦不敢轉稟督撫爲詞加之駁飭並將九龍江土司所轄十三板納地方俱是內地所管歷年土司出缺俱由內地揀選承襲等詞明白宣示措詞俱爲得體此項照會見由該鎮府行知該大萬如該頭目接到照會後遵照所駁情節謹守舊規即可相安無事儻或再有僭越冒稟情

事該督應卽據實具奏○丁卯兩廣總督承保卒贈內大臣賞銀

一千兩治喪予祭葬諡恪敏○以百齡爲兩廣總督調吉翰爲山

東巡撫以先福爲江西巡撫調衡齡爲廣東布政使以袁秉直爲

江西布政使調會煥爲湖北按察使以傅鼐爲湖南按察使

由辰沅永

補道

○庚午諭軍機大臣等阿林保等覆奏查明泉州糧價較貴

緣由摺內據稱漳泉地方向賴臺米接濟近年洋匪未靖臺灣商

販較少泉州米價稍昂委無通盜濟匪情事見在蔡朱二逆常到

淡水一帶劫掠商船該逆劫得一船卽用之不盡往往放回勒贖

其無須內地米糧已可槩見等語杜絕接濟一事食米最爲要務

阿林保等旣知盜船食米不全資內地偷運止須將臺灣商販劫

掠一船卽可用之不盡並借此勒贖是盜匪接濟之源實在乎此

該督撫等頻年查辦海口接濟於臺灣販米從未加意籌及何以

杜絕蕪芽使之淨盡無怪蔡朱二逆之殘喘尙存也前已降旨令該督撫將臺灣商販米船應如何妥爲防護隨時稽察之處酌立章程奏聞務卽妥辦以清盜源又另片奏查勘蛤仔欄地勢番情另行的辦一節蛤仔欄北境居民見已聚至六萬餘人且於盜匪窺伺之時協力備禦甯同殺賊實爲深明大義自應收入版圖豈可置之化外况其地膏腴素爲賊匪覬覦若不官爲經理妥協防守設竟爲賊匪占踞豈不成其巢穴更爲臺灣添肘腋之患乎著該督撫熟籌定議應如何設官經理或用文職或駐武營隨宜斟酌期於經久盡善爲要再梁上園摺內敘及蔡逆賊船進至蘇魯港之時先已率眾上岸有該處番人與閩居民吳氏擒獲數賊始驚潰而去嗣朱逆復又竄往亦經居民與官兵夾攻敗賊等語該處居民見官兵剿賊卽知如此出力著卽詳查加之獎賞若係著

名賊目多人應卽奏明酌賞頂帶以資鼓勵○王申諭吉綸等奏
查明嘉慶十一年廣興來東審案經知府張鵬昇金湘聯銜向前
任藩司邱庭澹於庫存節省項下借領銀四萬九千九百餘兩以
備供應等語奉差大員應得夫馬廩給俱有定例何至濫行供應
需數萬兩之多今廣興赴東審案已革知府張鵬昇金湘因需費
繁多輒聯銜稟明藩司邱庭澹借領庫項並不慮其駁斥邱庭澹
亦竟聽屬員之言如數支發殊出情理之外藩司經理錢糧絲毫
皆關國帑卽因公那移尙干例禁况不過供給所需竟敢擅發庫
項以資豫備公館食用希圖見好於欽差實爲外省惡習且藉此
爲名浮冒多銷從中侵蝕未必果係辦差之用似此相率效尤非
虧短庫項卽攤派閭閻弊竇叢生何所不至此而不加以懲治何
以杜逢迎而飭法紀朕又豈能因此停派欽差審案一任民間冤

抑不爲申理乎所有此案盜支庫項之前任山東布政使邱庭濂
著革職拏問交大學士等會同刑部提同另案問以杖徒在部待
質之張鵬昇金湘嚴審加等定擬具奏爲天下直省止知逢迎罔
顧名義無恥小人之戒至前任高唐州孫良炳前署滕縣之禺城
縣董鵬翔雖遭廣興呵斥並不遵攤差費忿激告病殊屬可嘉伊
二人於病痊後著該撫給咨送部引見候朕降旨○諭前因召見
周廷棟詢以廣興奉差東省有無貪婪劣蹟周廷棟力言其無尙
以廣興才具明敏枝梧掩飾會降旨給以五品頂帶休致茲據山
東查明覆奏廣興審辦李瀚一案卽得銀至數萬兩之多周廷棟
同赴山東於廣興得受贓款竟毫無見聞該省供應廣興極其繁
華周廷棟照常豫備伊卽不加挑斥甯不疑及廣興之任性作威
爲婪索地步且於朕詢問時猶以廣興尙屬敢言廣興盜弄威福

恣其慾壑奇貪奇酷品行卑污獲罪在此朕豈因廣興敢言加之
罪戾乎是其庸懦無能奏對又復顛倒失實本應發往新疆姑念
其年已衰邁免其遠戍但周廷棟如此孤恩亦何顏再膺章服之
榮周廷棟著革去五品頂帶永不敘用○諭清安泰奏密查廣興
從前赴豫審案婪索款蹟一摺據奏廣興初次赴豫除公送盤費
銀二千兩外實不問另有餽送第二次赴豫據巴哈布供該省司
道以前送盤費二千兩尙不滿意當卽另湊銀一萬兩交巴哈布
寄送三次赴豫因藩司齊布森向臬司諸以謙道員呂昌會談及
上次曾有司道公送廣興程儀一萬兩之事此次止好照前辦理
隨與臬司諸以謙道員呂昌會知府阿勒景阿湊銀一萬兩仍交
巴哈布轉寄並據稱前兩次巡撫馬慧裕均送盤費銀五百兩等
語廣興任性作威肆意婪索前在山東審辦李臨控案恐嚇取財

數至累萬茲據清安泰查明伊二次三次赴豫又得受程儀二萬兩經朕親加廷訊業據供認屬實除已降旨將廣興正法外所有致送程儀之馬慧裕齊布森諸以謙呂昌會阿勒景阿均著交部嚴加議處巴哈布前因爲廣興豫備公館已照部議降三級調用今又查出兩次寄送銀二萬兩著再交部嚴加議處又諭廣興前在東豫兩省審辦控案任意威嚇婪索賊銀數至累萬經朕親加廷訊已降旨將廣興處絞廣興種種藐法營私伊雖已身罹重典尙覺罪浮於法廣興之子蘊秀見係通政司學習經歷並著革職發往吉林充當苦差以示懲戒○癸酉諭廣興奉差豫東二省擅作威福贓私累累其勢燄薰灼幾於人人切齒而在廷大臣及言官等從無一人彈劾若云實無見聞其誰欺乎上年廣興緣事革職後經朕降旨令山東河南密行查訪始俱一一敗露設早有人

奏及小懲大誡何至狼藉如此之甚朕召見臣工從無虛日何嘗
於廣興獨加信任乃諸臣等並不據實劾奏惟相與隱忍待其稔
惡自斃豈公忠體國之道乎今廣興業經伏法其平日緘默不言
之臣工等本應一併交部議處姑念人數過多免其深究仍俱嚴
行申飭至科道職司言路其籍隸本省者見聞尤確廣興如此敗
檢婪賊與周廷棟在東省審案竟有周全天下事廣聚世間財之
謠該省科道焉有不知之理乃並無白簡從事者謂非心存觀望
而何近日科道風氣惟知毛舉細事或更改成例以博建白之名
實則欲藉此見長干進或竟受人屬託邀譽沽名皆難逃朕洞鑒
伊等於無關緊要之事動輒瑣屑陳奏遇此等大奸大惡轉相率
容隱國家又安用此臺諫爲耶所有自嘉慶十一年以後籍隸山
東之科道均著交部議處以示懲儆○丙子諭軍機大臣等昨經

降旨將邱庭澹革職拏問交大學士刑部嚴訊本日據奏訊問邱庭澹供稱欽差到濟甯時張鵬昇等稟請暫借各府州縣養廉以備支應邱庭澹因關繫庫項會經具稟長齡長齡當下將稟帖交還旋於是晚差家人告知藩司令其暫行借領邱庭澹隨借給銀四萬九千餘兩伊任內尙未歸款完結並據張鵬昇金湘同供伊等會將支借養廉墊辦供應回明巡撫等語實出情理之外庫項關繫國帑絲毫不容那移如果藩司違例借支巡撫尙當加之參劾豈有藩司徑稟巡撫巡撫遽准藩司將庫項借給屬員俾資供應欽差之理廣興貪婪不法恣意橫行固屬可恨而外省一味以供應欽差爲名擅動庫項上下一氣扶同弊混該省吏治又豈可問究竟伊等平日辦理地方公事有何弊竇慮其指摘而爲此違迎消弭之舉此而不嚴行懲辦法紀安在見在和甯已卸烏嚙木

齊都統之任將屆回京著伊於接奉諭旨後卽速馳驛前往蘭州署理陝甘督篆一面傳旨將長齡革職拏問嚴行審訊具奏如果長齡供認屬實並無狡賴卽定擬發往伊犁由驛具奏將長齡監禁候旨如長齡堅不承認竟與邱庭澹等供詞互異卽一面具奏一面派員將長齡押送來京與邱庭澹等對質另候覈辦○丁丑追封故貝子蘇懿爲貝勒命輔國公載錫帶領侍衛十員往奠茶酒○戊寅諭軍機大臣等本日召見賽沖阿詢及洋面情形據稱閩省漳泉二郡向不產米全仰給於臺灣從前商販疏通食貨贖足皆緣商船高大梁頭有高丈數尺者又准配帶礮位器械閱遇盜船克資抵禦近年洋匪不靖恐其牽劫商船梁頭不准過高又恐礮械出洋有接濟盜匪之事不准攜帶商船畏懼盜匪無不裹足閒有出洋之船多被盜匪擄劫米石既資盜糧船隻亦爲盜有

兼有勒贖情事是以商販不通漳泉米貴之由在此刻下蔡逆實已窮蹙可否仍准用高大梁頭並配帶火藥器械則遇盜足資抵禦等語盜船接濟之源最重食米其搶掠食米既專注臺灣商販之船則商販往來首當防範該督撫不此之慮而止向內地口岸設法稽查辦理尙非扼要上年冬間因御史條奏曾經降旨交該督撫等妥議辦理近因該督撫奏泉州米貴緣由復經降旨詢及此時不可不熟籌良策迅速施行朕思兵船在洋剿賊東追西逐總未能肅清洋面迨經嚴飭跟追窮其所向又往往以海洋遼闊不能遇賊爲詞揆厥緣由或係盜船畏懼兵威望而卻走亦或竟因兵船無可劫掠故盜船不復駛近而兵船亦遂無可致力此時商船旣因船小無備每爲賊所吞噬若照賽沖阿所議還令改易大船多帶火藥器械又慮賊匪牽劫所獲滋多而商船出洋之後

無可稽查更難保無不肖奸徒陰爲接濟此時欲求其有利無弊莫若酌派兵船與之同行在商船資兵力衛護可以無慮盜劫而亦不至啓奸商濟盜之漸在兵船既可衛護客販杜絕接濟設遇盜匪肆劫前來更可藉以攻勦向來兵船商船各有旗號盜匪可以瞭望而知不如將所用旗號渾爲一色勿示區別則盜船駛近之時可以立整兵威乘機往勦不但大獲勝仗並可剪縛渠魁卽爲勦捕起見亦計無逾此且商販流通漳泉一帶得免食貴而盜船無由接濟盜萌卽可從此杜絕此爲正本清源之道但須妥議周詳行之不至窒礙豫除一切弊端方爲盡善著卽將如何辦理緣由詳議速奏○庚辰諭朕恭閱 聖祖仁皇帝實錄內載前明宮內每年用度金花銀九十餘萬兩光祿寺每年送內所用各項錢糧二十四萬餘兩每年柴炭等項又不下數萬兩維時康熙年

開宮中用度已大加刪減較前明宮用尙不及十分之一我皇
考高宗純皇帝臨御六十年恪守前規益加儉約比較康熙年
閒宮用更爲減省朕紹膺丕緒家法祇承屏斥浮靡躬行節儉
一切宮中支用均照乾隆年開舊例遵行罔敢稍逾誠以一人恭
己百爾承風惟恐稍涉紛華易滋煩費若臣工等果能仰體朕意
共勵廉隅亦何至有簠簋不飭之事卽如廣興前赴東豫二省審
辦控案貪贖款蹟種種旋卽逮問伏法皆由伊不自檢束狎玩優
伶任意花消勢必須婪索多贓供其揮霍殊不知一經敗露憲典
難寬脂膏轉不能以自潤此縱欲敗度者之所以自貽伊戚也且
廣興奉差審案原令其詳覈獄情訪查弊竇乃該省地方官輒以
供應餽道希圖見好伊等平日辦理地方公事若果無可指摘又
何必爲此逢迎消弭之舉此明係屬吏長官扶同一氣稔知廣興

素性貪鄙又喜多言遂爾措捐養廉竭力彌縫飽其慾壑罔知節省該員等所得廉俸原以贍其身家深其操守今既須浮濫支應自必所費不敷擅那庫項卽事後歸還而以有定之俸廉供無窮之糜費勢不能不派累閭閻多方朘削迨至劣款發覺與受俱有應得之罪按厥所由總由諸務不加撙節之故嗣後內外大小臣工惟應交相勸勉儉以養廉無蹈浮靡覆轍以副朕整飭官方至意○諭吳璫托津奏違旨將荷花塘工程辦理不善之錢濬李亨特審明定擬具奏一摺此次荷花塘築隄處所因河底稀淤甚深壩基未能穩固合後復開不特糜帑需時而下游田廬民舍所損實多錢濬以微末汎弁妄行倡議咎無可恕著照所請發往伊犁充當苦差李亨特承辦緊要工程輒照錢濬所勸力爲撙節那彥成本不諳河務輕信其言致壩基不能堅實已合復開李亨特本

應發往伊犁姑念伊亦係誤聽人言急欲歲事尙非有心貽誤著
加恩改發熱河效力贖罪○辛巳諭吏部奏嚴議馬慧裕等餽送
廣興盤費銀兩請分別降革一摺欽差查辦事件原應潔己奉公
屏除餽遺卽使有一二交好解囊相贈尙應遠嫌辭卻乃廣興任
意苞苴其初次赴豫時轉以公送盤費銀二千兩未遂所欲復於
二次三次需索銀共二萬兩交巴哈布寄京在廣興貪贖無厭固
屬罪不容誅而該省司道等因廣興初次赴豫未爲滿意輒兩次
攤湊銀兩餽送數至二萬兩之多竟若援以爲例自由該司道等
平日辦理地方公事多有弊竇恐被廣興指摘爲此逢迎消弭之
舉實屬卑鄙不職齊布森請以謙呂昌會阿勒景阿巴哈布均著
照部議革職至馬慧裕兩次餽送廣興盤費銀一千兩已屬不合
又失察所屬司道湊送銀兩亦難辭咎姑念伊所送銀兩係自出

己賞較之齊布森等公同攤漢尙屬有閒所有部議降四級調用
之處著加恩改爲革職留任○熬圖緣事降調以穆克登布爲江
蘇按察使馬書欣爲河南按察使

出廣東高
廉道遷

○乙酉諭松筠等奏

遵旨辦理叛匪緣由一摺甯陝遣戍降匪本係桀驁不馴之徒狼
子野心日久斷難安靜朕早已料及節經降旨令該將軍參贊等
密爲留心妥辦不可姑息今塔爾巴哈台安插降匪蒲大芳等三
十一人果有聚謀不軌之事可恨已極松筠一得祥保之信卽密
派伊犁領隊大臣色爾袞前往藉巡查金廠爲名不動聲色與祥
保及本處領隊大臣百順愛新布連夜帶兵分赴各屯將蒲大芳
等悉數拏獲鞠訊之下該犯無可置辨立將該降匪等三十一名
處斬梟示所辨妥速可嘉松筠派色爾袞前往可謂得人祥保色
爾袞百順愛新布均著交部議敘其隨往奮勉之滿洲錫伯索倫

察哈爾厄魯特等處官兵著松筠等記功記名遇缺儘先升補其出力之綠營弁兵著行文陝甘總督遇有本營缺出卽行拔補以示鼓勵至馬兵陳先貴步兵張洪二人同由甯陝道成前往一聞蒲大芳等商議謀叛卽逐一指名首告實屬能知大義者加恩均卽以把總起用撥歸烏魯木齊提標當差准其娶妻成家用示激勵至此外同在塔爾巴哈台當差之戍兵馬友元等二十四名松筠見在派令雷仁前往帶赴伊犁安插並請將南路分戍之甯陝歸伍兵丁一百三十七名一併陸續調赴伊犁安插所辦甚是松筠仍當督飭各營將領留心防範有犯卽懲不可稍存姑息○丙戌諭前因審辦廣興出差婪贓一案言官等竟無一人彈劾特令將籍隸山東之科道查取職名交部議處本日據吏部奏請將該員等均議以降二級留任尙覺過輕科道職司糾劾遇有不公不

法者原應隨時參奏乃廣興兩次奉差前往山東審案時擅作威福賊私纍纍聲名狼藉其籍隸山東之科道豈無聞見卽一時不能得其貪婪實據按款參奏亦應將外間傳聞周全天下事廣聚世間財之誣及早密陳以備查訪朕自能權衡辦理乃心存觀望相率緘默不言殊非國家設立臺諫之意近日科道各員條奏大率摭拾細故或由部院衙門擢用者卽將原衙門成例多方挑剔有意紛更細覈多不可行此內或挾私報復或受人屬託均未可定而於此等敗檢婪賊之大臣並無一人指名登諸白簡若不嚴行處分何以示懲所有光祿寺卿前任兵科給事中汪鏞光祿寺少卿前任刑科給事中賈允升兵科給事中周廷森掌廣東道御史李本榆掌江西道御史孔昭虔江西南安府知府前任掌京畿道御史蘇兆登均著於見任內降一級調用○丁亥諭朕自嘉慶

四年親政以來簡擢各省臣工文職自藩臬以上武職自總兵以上於來京瞻覲時俱額請恭謁 裕陵經朕加恩允准俾申感慕之誠計至今已閱十年餘矣彼時該員等或因曾受 皇考簡用

渥恩經朕復授顯職特於陛見時懇請叩詣 山陵藉展忱悃原

係理所宜然見在各省文武大員多係在乾隆年間庶察經朕漸次游擢若亦准陳請叩謁未免無所限制嗣後升任來京入覲之文武大員著無庸再行奏請○諭軍機大臣等董教增奏查明安省虧空情形請酌改彌補章程以收實效一摺安徽各州縣未完倉庫兩項共銀一百八十餘萬兩經歷任巡撫先後奏請展限彌補至嘉慶二十二年即可全數清完茲據董教增奏數明節年提解銀數僅完銀五十餘萬兩而自八年以後實又虧銀三十萬九千餘兩是名爲彌補虧缺實則掩舊那新若不實力清釐何所底

止此項倉庫未完銀兩本係格外施恩准其密爲籌補必須立定章程期收實效方可於事有濟該撫摺內稱衝途州縣差務賠累處於不能不虧之勢等語看來該省彌補不力總藉口於差務支應浮費繁多以致未能節省報解此實近年陋習殊不知驛站支應本有例銷之款卽稍有不敷亦應設法調劑何得藉此虧缺庫項盈千累萬若不亟加整頓杜其流弊卽年年彌補亦不能覈實清理嗣後該撫惟應通飭所屬大加減省不惟欽差過境不得任意浮糜卽本省大吏遇有查閱營伍履勘地方等事一應尖站供頓亦當倍加儉約該州縣等自不至有賠累積虧之弊至此時新虧各員本應查明懲辦姑念展轉接受人數眾多且致虧之由尙非侵漁入己著照該撫所請將新虧之項准其自十四年爲始分限四年完繳如尙有拖延卽著嚴參究辦其無著之九萬餘兩先

行彌補於四月內勒限全完至舊虧未完之項准其於院司道州縣養廉每年酌扣五成由司庫存貯歸款藉資彌補其州縣互相津貼一節尤應妥爲籌辦勿任本任之員心存諉卸津貼之員得以藉口此後不得再有那新掩舊之事仍於每年將實在完補數目具奏一次該撫務須率屬實力遵行勿仍以差移賠累爲詞藉端延宕

二月壬辰 上御經筵○乙未諭軍機大臣等吳璥奏查明江南

黃運河湖見今實在情形一摺並分別辦理條款開單進呈朕詳加披覽所論俱是南河敞壞已久其病百出卽如吳璥摺內所稱海口固須挑濬而大隄不能堅鞏則一經旁洩挑亦仍淤蓄清固屬至要而隄壩不能修復則一遇盛漲蓄亦必潰今聞壩無減黃之路五壩無節宣之方倒灌之後倍難就治等語所言實爲切中

事機此時辦理各工應如何分緩急先後之處朕均不爲遙制吳
璈見任正總河自應主持定見與副總河徐端盡心經理但恐於
地方呼應不靈鐵保以總督並轄河工當隨時相助爲理俾諸事
不至掣肘以期次第補苴○壬寅諭朕勤求民隱整飭官方惟恐
下情不能上達遇有直省控案或關涉官吏營私民情屈抑者特
派大員前往讞辦實不得已之苦心該大員仰承簡命必應自矢
潔清虛公聽斷方爲不負委任前此山東省控牘頻仍朕以山東
雖距京較近何以小民來京控訴者比之直隸山西河南諸近省
獨爲繁多自由該省吏治廢弛之故因派周廷棟廣興前往審訊
其該省積控之案亦卽令其接辦廣興兩次在東居住多日不料
其飢法貪婪縱欲敗度竟至斯極業已明正典刑用昭炯戒惟是
廣興性本貪鄙又喜多言東省官吏遂極意逢迎飽其慾壑希冀

代爲彌縫掩蓋廣興之禍雖由自作實東省大小官吏釀成終亦不免革職發遣陷人終自陷耳若該省官吏等平日悉皆奉公守法無可指摘亦何至畏懼廣興如此之甚乎卽如山東州縣中原遜志孫良炳董鵬翱不肯趨奉廣興廣興亦不能將其任內事件格外拔求乃不肖官吏止知逢迎罔顧廉恥屬員公然以差費爲名具稟上司上司公然商同那移庫項攤捐歸款究其攤還之項亦不知出自何所若謂自捐廉俸盡出己貲則又何須先那庫貯耶似此上下交通斂財取悅吏治豈復可問責屬卑鄙無恥已極况廣興任性作威貪以酷濟伊等或尙以此藉口若如額勒布金光悌等赴東審案其供給俱經發價購辦何以亦浮開差費至三千兩可見外省官吏竟樂以辦差爲糜費開銷之地名爲利人實則利己竟成貪官要錢之一巧法此等惡習實堪痛恨嗣後欽差

官員至所差省分及經過地方永不許有差費名目其該省督撫大吏除應請聖安者照例親身出迎此外槩不准差人迎送如有違例供給迎送者欽差官員卽指名參奏若欽差例外需索著該督撫指名參奏但不得因有此旨於欽差官員應得夫馬廩食任聽州縣官短缺稽遲致誤郵傳如有遲誤亦准欽差官員參奏並聞外省督撫及司道等官因公經過所屬地方其夫馬公館供應尤爲不貲外省大僚過境本省上官遣人迎送其所遣之人沿途需索夫馬供應且有得受站規等事均不可不嚴行飭禁若有前項弊端不卽革除舉發經朕查出必當從嚴治罪決不寬貸總之內外大小官員身登仕籍先當審明義利朕近御製崇儉詩一首義利辨一篇並繫以銘辭訓誡臣工爲大臣者惟思敬以事上廉以律身平居以節儉爲先臨事以公義爲重一切非分之利絲毫

勿取爲下吏者勤於政事潔己愛民雖有貪暴上官不能持其短
長亦無庸資緣結納曲意承迎天道福善禍淫清白之吏身名俱
泰子孫蒙休較之貪利忘義悖入悖出禍不旋踵者其得失奚啻
霄壤利害從違惟視其人之自擇耳此次辦理廣興一案在廷臣
工實已共見共聞恐外省官吏狃於習俗尙有不知懲儆者特再
明白宣示俾大小臣工交相勸勉砥礪廉隅以飭官常以正風俗
朕實有厚望焉○諭大學士會同刑部將山東省那借庫存養廉
濫行供應之前任藩司知府等分別定擬一摺以邱庭澂等那移
庫項雖經歸款未便照限內全宥例免罪均請加等將邱庭澂發
往伊犁金湘發往烏嚕木齊張鵬昇發往軍臺固屬按例加重辦
理但此次差費雖係借支養廉事後歸款若各員等可以自出己
貲何以必須豫動庫存之項旣不能攤湊於前又何能歸補於後

其來路正不可問至據供尙無餽送情弊但彼時廣興到東金湘等會置辦紗匹致送獨非餽遺而何詳加勘覈殊覺情重法輕前任藩司邱庭澹錢糧是其專責目應慎重出納乃輒照該省從前辦差陋習徑稟巡撫給發庫項至四萬九千餘兩之多以資供給若各省藩庫紛紛效尤擅行那用其流弊何所底止伊犁烏嚕木齊程途雖遠而耕種成熟地方繁庶邱庭澹著改發黑龍江效力贖罪到成後枷號三箇月金湘一聞廣興奉差東省慮及廣興性情貪暴恐辦差不妥被斥商同張鵬昇等稟請藩司借領庫項支用且伊於嘉慶十年因額勒布金光悌赴東審案已稟借過庫銀數千兩辦差豈亦畏額勒布等之貪暴婪索乎似此逢迎見好實爲卑鄙惡習至魏紹濂等公送廣興程儀一萬一千兩又係金湘轉託馬振玉稟兌來京其情罪尤重金湘亦著改發黑龍江效力

贖罪到戍後枷號半年用示懲儆張鵬昇聯銜稟借庫項支應差費咎亦難寬著改發吉林效力贖罪○乙巳諭禮部具題原任直隸總督鄭大進之妻江氏見年一百歲請照例給銀建坊旌表一本該氏係一品命婦年屆頤齡允屬熙朝人瑞若與民間壽婦一體照常給賞未免無所區別嗣後遇滿漢三品以上文武大員之父母妻室有年至百齡者應如何從優賞賚之處著禮部妥議具奏所有鄭江氏應得恩賞卽照新例辦理尋議凡壽民壽婦年逾百齡以上者向例給銀三十兩建坊今擬將三品以上者請再加賞銀十兩段一匹其百有十歲至二十三十以上者以次加倍給銀從之○丙午戶部右侍郎劉鏡之以祖母老病乞養允之○丁未 上啓鑾謁 東陵○免經過地方額賦十分之二○庚戌

上謁

昭西陵

孝陵

孝東陵

景陵

裕陵

○辛亥清明節

上謁 裕陵再行敷土禮禮成甘雨霑足賞鑿道辦差兵丁一

月錢糧再免經過州縣額賦十分之二 上回鑿○王子諭德麟

素性懶惰且有執袴習氣昨經領侍衛內大臣酌派豫備前引差

使伊竟敢不遵並云情願受參實屬任意偷安本應照部議革職

姑念伊父福康安著有微勞止生德麟一子若使伊尙有兄弟亦

不能稍從寬宥上年德麟獲咎已由貝勒降爲貝子此次格外加

恩免其革去見襲世職著該旗傳知德麟閉門思過不得出外遊

蕩但自嘉慶四年後廷臣中多有以福康安蓋簋不飭彈劾者朕

因事無實據特免究辦見在南河興辦要工需費甚多著德麟自

行酌量措交家貲若干呈明本旗都統轉奏解赴南河備用以示

薄罰○癸丑琉球國中山王尙灑遣使表謝冊封並奏該國餽送

冊使宴金請旨敕賜收受得旨此項宴金使臣等卻還原屬仰體

朕意不欲滋擾外藩今仍不必收受令來使帶回○丙辰諭據蘇志等奏查明段庫正庫見存段絀數目先行具奏一摺段庫存貯段絀絹布等項均應覈較歲用數目計足數幾年之需此內俟何項短缺再先期行文製備其支放之時並應按照存貯年分先後挨次給發推陳出新俱歸適用今庫內所織大段一項多至三千五百餘匹杭絀一項多至六萬五千餘匹其他亦皆充羨乃該庫每年仍向內庫領用並行文外省織造源源報解及支發時又不按新舊次序以致陳陳相因充物堆積日久漸成朽蠹此不但耗費錢糧且蠶絲纂組物力亦屬可惜至布匹絨斤雜貯四樓冊籍並未分析閱載難於查覈以致守庫兵丁生心竊取此皆由歷年該管大臣及管庫司員等平日養尊處優怠忽疲懈漫不留意沿習因循本應自嘉慶四年以後管庫大臣及司員等俱交部議但

人數眾多姑免逐一追究經此次查明之後應更定章程覈實稽考所有綿段紗羅絲絹等項某項應俟庫存若干方准行文織解並每閱幾年盤驗一次之處著交前次派出會議銀庫章程之滿漢大學士六部尙書於香山回鑾後一併酌議章程具奏請旨議上得旨向來簡派三庫大臣俱係一年更換於庫貯利弊未能盡悉嗣後著定爲三年更代每屆三年之期卽著派出之管庫大臣奏請簡派大臣數員將庫貯各項會同盤驗再行交替用昭覈實○諭軍機大臣等韓對奏查閱澳門夷民安堵並酌籌控制事宜一摺澳門地面西洋人舊設礮臺六座其自伽思蘭礮臺至西望洋礮臺迤南沿海一帶本有石坎因形勢低矮上年英吉利夷兵卽由此爬越登岸今擬加築女牆一道增高四五尺共長二百餘丈經韓對查閱指示該夷民目等歡欣願辦應卽令其剋期興

工俾資防護○丁巳閩浙總督阿林保奏殲盜首朱濱賞總兵

官許松年花翎並雲騎尉世職總兵官胡于鉉下部議敘○以廣

玉爲福建按察使由山西冀甯道遷○己未 上還京師

三月辛酉朔達慶緣事降調以福慶爲倉場侍郎○蔣予蒲緣事

降調以許兆椿爲倉場侍郎轉周兆奎爲刑部左侍郎以胡克家

爲刑部右侍郎○以秦瀛爲左副都御史由光祿寺卿遷○調蔣攸銛爲

江蘇布政使以梁敦懷爲雲南布政使賞同興四品頂帶爲雲南

按察使由五品頂帶江○癸亥 上親耕藉田○ 上啟鑾謁

西陵○免經過地方額賦十分之三○丁卯 上謁 泰陵 泰

東陵至 孝淑皇后陵奠酒回鑾○再免經過州縣十分之二○

己巳諭阿林保奏籌議閩省鹽價一摺據稱閩省內地八府二州

鹽務在省城上游者謂之西路在東南沿海者謂之縣澳東南縣

東華續錄

嘉慶二十七年

澳官商積疲未便遽議加增惟於西路鹽斤酌加價二釐共可增銀六萬五千五百五十兩六錢等語前因吳璣等籌備南河經費奏請加增鹽價當降旨令督撫鹽政體察情形妥議具奏昨據兩淮長蘆山西等處俱陸續覆奏加價已批交部議矣今聞省鹽課本屬有限正課尙不能如期完繳東南縣澳既未便遽議加增一省之中事出兩歧且西路鹽價驟加民慮食貴勢必越境販私本處額引又將滯積於事仍屬無益所有阿林保議加西路鹽斤二釐之處著不准行○甲戌 上閱健銳營兵○丙子 上還京師

○西安將軍三等公德楊泰卒遣內閣學士玉福迎奠茶酒賞銀五千兩治喪子祭葬諡壯果入祀昭忠祠並命四川省城建立專祠以其子蘇冲阿襲一等侯○己卯諭本年正月間先據松筠奏稱在塔爾巴哈台安插之甯陝叛兵蒲大芳等三十一名謀爲不

軌被人首告當於拏獲之後悉行正法此其孽由自作松筠所辦
尙無不合但未將該犯等謀叛實據詳悉查明又未將到案供詞
奏聞已覺草率至於塔爾巴哈台尙有安插叛兵馬友元等三十
四人並非與蒲大芳等同謀而松筠續又奏稱馬友元等於查拏
蒲大芳之時並無恐懼因飭令調至伊犁派色爾袞迎赴中途卽
行正法此外尙有分戍南路三城之王文龍等一百三十五名與
蒲大芳等相隔尤遠更不能知蒲大芳等謀逆情事而松筠本日
又奏稱恐有聞知蒲大芳等信息心生疑懼或敢妄逞桀驁戕害
人命伊等當日本係蒲大芳等同惡罪犯今因蒲大芳株連不能
寬貸已俱令各城送至伊犁仍派色爾袞迎赴前途分起正法約
計此十日內外可以全數辨結等語實屬草菅人命暴戾殘忍荒
謬已極甯陝叛兵從前固罪犯應死但彼時既予寬貸安插新疆

豈有事隔數年無端槩予駢誅之理馬友元王文龍等如果與蒲大芳同謀不軌抑或於蒲大芳等正法之後續有滋事之處一經查明確實自當一律論死不必姑息今松筠於馬友元等二十四人止稱其不知恐懼遂行誅戮於王文龍等一百三十五人則言其本係同惡罪應株連豈復成話松筠於此一事辦理輕率冒昧至此看來伊竟胸無把握此外一切事務又安望其能經理妥協寬嚴得當乎松筠不勝伊犁將軍之任著傳旨嚴行申飭交部嚴加議處卽來京候旨○庚辰諭朕昭事上帝肅將誠敬凡值郊壇大祀一切典禮儀節敬稽皇考高宗純皇帝舊制遵行溯查乾隆元年至二十四年聖駕詣壇均至昭亨門外降輦至乾隆二十五年皇考聖壽五旬詣壇時係由北首外西天門進廣利門內降輦蓋節步履之勞正以壹精禋之格迨三十

七年之後 聖壽已越六旬始經欽奉 諭旨將所有升級次數及降輦步行遠近無關大體諸儀節交廷臣詳議量從減省今朕春秋甫屆五旬一切登降儀文並未稍覺繁重惟從前 皇考既有由北首外西天門進 廣利門詣 壇成例著該衙門敬謹詳查 皇考當日降輦之處有無記載如有一定處所卽當遵照舊儀如向無存記著將 昭亨門外降輦後步行遠近及 廣利門內應於何處降輦步行稍可節省詳細相度繪圖具奏候朕酌行尋議 聖駕詣齋宮時乘步輦進北首外國西天門進 廣利門至 壇之西南隅對樹林降輦處起至南櫺星門左門止共計五十丈較 昭亨門外降輦處至南櫺星門左門八十三丈之處節省三十三丈臣等恭擬卽在新設櫻薦處降輦及祀日禮成後請仍於 神路西階下鋪設櫻薦處升輿從之○諭本年朕五旬萬

壽慶辰內外臣工例應敬獻冊葉以翰祝嘏之忱惟是近年以來
國家遇有舉行典禮諸臣等所遞之冊每有集用文選各書成話
而恭集御製詩文者尤多揆之文體究非正裁朕所弗取夫文以
典雅爲宗至進奉文字尤當體裁閎整華實並茂如古人所謂頌
不忘規者庶合乎對揚之義若槩用成話集爲詩文並非出自心
裁既無由覘其風學而於文章軌範更乖雅正嗣後臣工等呈進
冊葉惟當一歸體要或詩或文皆可各展所長以抒下忱而宣上
德無得仍習佻巧致失修辭立誠之旨○壬午諭向來欽天監奏
觀候本章凡遇節氣就風色方向所宜鋪陳吉語皆係先期豫備
朕所素知卽如本日交立夏節在辰初二刻八分欽天監奏其時
風從東南巽方來主年歲大熟等語朕披覽本章時甫交辰正該
衙門豈能於片刻之間繕本用印其爲豫擬不實可知朕崇尚實

政屏黜虛詞司天占驗原以察天文而驗人事如果應時協吉仰荷 昊慈固深欽感儻或風候偶愆亦可藉資修省若係虛應故事視爲具文殊覺無謂嗣後欽天監於觀候本章務須詳細占驗據實陳奏自本年夏至起每屆節令均於第三日具題以備省覽夏四月壬辰諭前因廣興奉差東省邱庭灑於藩司任內稟明長齡勤支庫項辦理差務事關那移公帑撫藩上下扶同一氣不可不徹底根究當經降旨令和甯馳赴蘭州署理督篆將長齡革職拿問在彼候質茲據和甯奏訊據長齡供稱邱庭灑稟借庫項會經阻止後來張鵬昇等回明已借庫存養廉墊辦並未說明銀數惟當時既不參劾事後又未稽察實屬糊塗至李臨控案係升任陝甘以後之事廣興婪索歌謠實不知情等語長齡身任封圻既經藩司稟請動支庫項有干例禁並不立時參奏已屬溺職孤恩

止知朋友私情不明君臣大義迨事後張鵬昇等曾經回明係借用銀款長齡又不詳詢細數據實參劾直與知情授意無異至李臨控案廣興威嚇取財雖事在長齡升任以後但該省吏治廢弛長齡在彼毫無整頓且地方官爭以逢迎爲事自因辦理公務多有弊竇慮及廣興指摘因而任聽屬員借帑辦差以爲消弭地步長齡實屬有負委任罪無可辭著卽由甘省發往伊犁效力贖罪以示懲儆邱庭瀝見無應行質對事件不必留羈刑部著遵照前旨卽行發遣○癸巳轉阿明阿爲工部左侍郎以蘇楞額爲工部右侍郎由總管內務府大臣遷○丁酉以多福爲內閣學士由太僕寺卿遷○以朱理爲光祿寺卿調慶保爲山東布政使以常格爲陝西布政使服闋○戊申諭前此松筠因塔爾巴哈台安插叛兵馬友元等二布政十四人於查拏謀逆之蒲大芳時並無畏懼飭令調赴中途卽行

正法其分戍南路之王文龍等一百三十五名與蒲大芳相隔雖遠松筠恐其聞知信息心生疑懼或敢妄逞桀驁又調赴中途分起正法並未將供情詳細聲敘卽槩予駢誅未免草菅人命是以降旨將松筠交部議處部議革職並令俟晉昌到任後來京候旨先行明白回奏本日據松筠奏稱前此蒲大芳謀逆曾稱我們五十餘人約定日期一面通知南路弟兄一面先殺官兵等語其馬友元等素日強入飯鋪任意索食強賒強買商民畏其兇惡不敢聲張當辦理蒲大芳時馬友元等跪視行刑向蒲大芳等言汝等先去我等隨後亦去卻不似汝等空自受死至王文龍等調赴伊犁行過阿克蘇於扎木地方聞得蒲大芳正法不肯前進及就戮時有言早不舉事爲恨者有言誰未殺過數十百人死亦無怨者且分戍南路各回民畏之如虎任入誰家無人敢拒該匪等實在

情形知之既確是以迅速辦理等語該匪等原係陝叛兵免死
遣戍稍有過犯卽當嚴懲設當該匪在彼搶掠滋事之時該管大
臣官員等立卽查辦示儆何至株累多人今蒲大芳逆謀敗露馬
友元王文龍等竟敢出不法言語而平日又有桀驁情事若再爲
姑息伊等狼子野心不知悔改互相勾約或生他變是松筠辦理
此案並非濫及無辜若彼時松筠具奏將供詞聲敘明確斷不加
以嚴懲卽因其辨理草率亦尙可原恕不令遠離將軍之任今伊
前奏旣屬含糊而此一百餘人必應調至伊犁覆加研鞫使其供
吐確實明正典刑原非過當忽於半途山谷中截殺成何政體不
知者轉似酷暴濫刑矣在松筠自恐事機不密釀成他患然案關
多命措置未免失當姑念松筠平日操守尙好熟悉新疆情形著
加恩賞給頭等侍衛授爲喀什噶爾參贊大臣回疆事務緊要松

筠臆司總轄仍當認真整飭辦理諸事寬嚴得宜無貲委任積拉
堪著卽回京另候簡用○諭軍機大臣等景安奏傅鼐升任臬司
苗弁等聞信後欲行懇留一摺朕因傅鼐歷任苗疆認真出力是
以特予簡擢用示優獎今苗民以傅鼐去任依依不捨習久相安
因屬人情所有但旣已奉旨該苗民自不得越例攀留况傅鼐未
離本省距苗疆不甚相遠仍可就近經理傅鼐上年甫經展覲此
時不必來京著於三年後再謁陛見每年於秋審事竣或秋成之
時前赴苗疆查閱一次旣可慰苗民愛戴之情亦可借資彈壓如
果接任之員經理得宜傅鼐於二三年後卽可停止前往至辰沅
道遺缺關繫緊要其接手之員必得精明強幹撫馭有方者始克
勝任著景安遴員奏補其一切屯兵等事著傅鼐將辦過章程及
見在情形詳悉告知後任俾得所遵守自可不致貽誤俾苗民益

臻甯帖○辛亥諭朕勤求治理整飭官方遇有貪墨不法者隨時懲治原期辟以止辟本年正月內因廣興奉差東省性情乖戾任意貪婪當卽明正典刑其逢迎餽送之地方官亦經分別懲處自應共知儆惕守法奉公乃甫歷數月英綸巡視省漕諸凡挑斥婪索多賦與廣興如出一轍甚至喚妓住宿較廣興尤爲卑污而該省州縣官曲意餽遺又與餽送廣興之事如出一轍相習成風毫無畏懼殊爲可惡在英綸等貪黷性成見利忘害而山東官員竟以一味逢迎爲事其吏治廢弛實不可問除英綸見在審辦外所有東省送銀各員無論多寡或英綸勒索及該員自送者均著吉綸查明奏請交部嚴加議處不可一名漏網廣興性喜多言畏其參奏今英綸又屬何故如此曲盡迎合何東省之官吏大半卑鄙殊不可解必應嚴辦以示懲儆至御史職司臺諫理應擇其平素

品行廉潔者方可保送今英翰如此貪鄙其從前遣行保送之兵

部滿漢堂官一併查明交部議處○王子清安泰卒調恩長爲河

南巡撫以許兆椿爲廣西巡撫秦瀛爲倉場侍郎由左副都御史遷○調

廣厚爲廣西按察使蔣繼勳爲浙江按察使○甲寅賜洪瑩等二

百四十一人進士及第出身有差○乙卯諭本年 尋壇大祀朕

欽遵乾隆二十五年 皇考高宗純皇帝舊制改由北首外西天

門進 廣利門內降輦詣 壇因見屈 方澤大祀特命太常寺

一體詳查 皇考高宗純皇帝當日改由外西門至內西門降輿

之制並令將步行遠近詳悉查丈奏聞本日據太常寺奏敬往

壇內相度地勢詳細丈量 壇之內西門外降輿處起至北櫺星

門東門止共計一百一十丈其北門外降輿處起至北櫺星門東

門止丈亦如之是兩處步行遠近實屬無異惟乘輿之路向山外

東華續錄 嘉慶二十七年 三

西門轉至北門外始行降輿多行約二里許未免紆遠於行禮時
刻轉致耽延本年朕春秋甫閱五旬未敢遽照 皇考高宗純皇
帝進至內西門內降輿之制著自此次起改於內西門外降輿仍
步行詣 壇惟向來金殿係設於神路之東此後著該衙門查照
舊制改設於神路之西○戊午故西安將軍繼勇公德榜奏極至
西郊 上親臨賜奠○諭各省封疆大吏守土是其專責遇有關
涉外夷之事尤當立時親往勘辦務臻妥協方爲無忝厥職前此
吳熊光在兩廣總督任內英吉利國商船帶兵入澳占據東望洋
娘媽閣加思蘭三處礮臺雖向係西洋商人防守所設但究在中
國地面卽與關入內境無異吳熊光身任封圻其咎已無可辭本
日據百齡查奏上年七月二十一日該夷兵船來至雞頸洋
面八月初二日抵澳上岸占據西洋礮臺地方文武節次稟報吳

熊光批令照常防範至十六日見該夷不退諭令封艙復經遊擊
邢世和香山縣彭昭麟請兵堵逐吳熊光亦俱批以鎮靜不可張
皇彼時香山縣有澳內居民四散澳夷乏食之稟吳熊光總未親
往查辦該夷兵見無准備將兵船三隻駛進虎門停泊黃埔吳熊
光因於九月初四日具奏始派兵防範並令碣石鎮黃飛鵬管帶
師船在省河一帶馳泊至二十三日該夷兵目又駕坐三板艇船
由黃埔至省城外十三行停住求見總督懇請代奏在澳寓住吳
熊光總未見面止令其回至黃埔候旨並飭禁買辦火食該夷人
慌急駕船欲向十三行裝取火食時官兵喝阻不理總兵黃飛鵬
開礮轟斃夷兵一名帶傷三名該夷兵卽行退回至十月初奉到
諭旨吳熊光僅檄調各標兵丁在黃埔澳門駐紮防守並未攻擊
至十六日恭宣諭旨夷兵當卽畏懼情願撤兵復求開艙吳熊光

諭令全行退去始准貿易該夷兵陸續退至外洋等語英吉利夷船帶兵入澳藉名保護西洋陰圖占地謀利情殊詭譎卽應立時驅逐况此次該夷兵遇官兵閃礮並不敢稍有抗拒及奉有嚴飭諭旨亦卽畏懼開帆遠去是該夷兵尙知震懾天威無他伎倆設吳熊光於該夷兵登岸之初卽親往彈壓曉以大義一面調集官兵防守該夷兵自必知所畏憚卽時退出庶足宣示國威吳熊光於此等要事遲至月餘始行具奏旣未親往查辦該夷兵目求見又止派員往諭並不面詢斥逐雖開船在夷兵旣退之後而許其開槍究在夷兵未退之先是奏報旣屬遲延辦理又形畏葸且屢次夷人具稟及吳熊光批示並轟斃夷兵等事俱未入奏亦屬含糊吳熊光由軍機章京蒙 皇考高宗純皇帝不次超擢用至軍機大臣復經朕簡用歷任三省總督非新進不曉事者可比乃種

種錯謬實屬孤負委任吳熊光前已革職著學問交軍機大臣會同刑部審訊定擬具奏至孫玉庭前在廣東巡撫時並不將前後情形據實陳奏又不會同吳熊光迅速妥辦軟弱無能豈可復勝巡撫之任孫玉庭著革職回籍所遺貴州巡撫員缺著初彭齡補授伊見屆大祥到任時已將服闋其未到以前著章煦將雲南巡撫印務交伯麟兼署章煦卽赴貴州署理巡撫事務本年章煦已派視釐屆期應由黔赴京若彼時初彭齡尙未到任卽著藩司陳預暫行護理尋奏上得旨吳熊光辦理此事示弱失體其咎實無可辭著照撥發往伊犁效力贖罪○諭軍機大臣等百齡奏俟本年英吉利國貨船到時先期偵探各情形所見甚是該國夷人素性強橫誦詐雖見據夷商喇佛所稟夷兵不敢再來之語亦未可深信上年該夷人來澳時吳熊光等不立行查辦旣失之於寬此

時自應濟之以猛著傳諭百齡於本年該國貨船到時先期留心偵探如再敢多帶夷兵欲圖進口卽行調集官兵相機堵剿備止係貿易船隻並遞謝罪哀懇稟件亦應飭令停泊港外該督一面奏聞候朕降旨遵行

五月庚申朔諭本日永愨弘康各道人呈遞請安摺因交軍機大臣傳詢伊等遣來之人據稱伊等因端陽慶節遞摺等語殊不成話端陽非年節可比無甚緊要今沿襲虛文殊失滿洲舊俗除將永愨弘康申飭外嗣後各省將軍副都統等惟實心任事黜浮華而歸純樸似此無謂之摺永遠禁止○改貴州普安州爲直隸州以新設興義縣隸之○調福慶爲理藩院侍郎秦瀛爲左副都御史以玉甯戴均元爲倉場侍郎玉甯由理藩院侍郎戴均元由左副都御史遷○辛酉初彭齡以疾留京以鄂雲布爲貴州巡撫○調慶格爲安徽布政

使以廣厚爲浙江布政使調敦柱爲廣西按察使以翁元圻爲貴

州按察使

由雲南道南道遷

○丁卯授和甯陝甘總督○庚午諭本年

朕五旬萬壽前經派出督撫及將軍提督副都統各數人屆期來

京隨班祝嘏著傳諭伊等俱於九月十五日以後陸續到京不必

前赴熱河亦不准迎赴石槽等處行官接駕自十六日至二十日

此五日內分日具摺請安違者治罪至伊等獻悃翰忱見已排定

日期准令恭進膳品萬壽正日准各恭遞如意一柄此外惟年例

應進土貢及有備進書冊字畫者尙准其呈遞其珠玉陳設等件

一槩不准進獻朕不但不行賞收並不准呈覽○諭軍機大臣等

阿林保奏朱渥幫船救護道員清華並欲投首一招盜首朱瀆與

伊弟朱渥前因捕獲蔡逆夥黨許凜等一百六十四名聞金門鎮

許松年等兵船駛至正欲解赴投到詎官兵一見賊船卽放槍礮

將朱瀆轟死見在朱渥又於深扈外洋遇見蔡逆圍劫內渡道員
清華船隻立時趕散並懇該道轉稟准令投首覈其情節真偽尙
難遠信見在朱渥已出外洋如果往招夥黨相率來投阿林保等
當剴切開導以前此伊兄朱瀆捕獲蔡逆夥匪欲行投獻彼時舟
師駛至官兵等並不知爾等意欲投誠惟遇賊卽剿是以開放槍
礮致朱瀆立時傷斃但擒賊投獻尙係爾等一面之詞並無憑據
未便遽准上岸如果爾等真心投首惟當立功贖罪或恐所帶幫
船猝被官兵轟擊此後於該船上設立標識知會兵船作爲記認
庶不至誤遭攻擊一面設法捕盜如能將蔡逆生擒轉獻不特伊
兄朱瀆罪免戮屍准令埋葬伊嫂等亦准登岸居住卽爾朱渥旣
經救護監司大員又復擒獲巨魁自當奏明准予投首免罪並量
加恩賞至所獲許稟等一百六十四名此時自必隨同在船其中

或聞有病斃逃亡者諒所不免務令覈實查明將見存各犯悉數送交地方官以憑審訊如此辦理該匪不能施其詭詐亦可收以盜攻盜之益俟朱渥將許稟交到後著阿林保等訊明定擬具奏清華由臺灣內渡猝被蔡逆賊船圍劫經朱渥趕散時朱渥與蔡逆曾否對敵清華身在舟中見聞自確著阿林保等一併詢問奏聞○辛未諭軍機大臣等本日都察院衙門奏卽墨縣武生李清泰呈控伊胞姪原發江蘇知縣李毓昌奉委查賑在山陽縣赴席是晚回家自縊該武生前往看視未及詳加盤詢經該縣贈以盤費領柩回籍後因查見伊姪箱內皮衣血迹生疑自行開驗見屍身青黑始知被毒身死等語朕詳加披閱其中疑竇甚多必有冤抑亟須昭雪以慰孤魂李毓昌在縣署赴席何以於回寓後遽爾輕生當夜自縊其事已不近情彼時山陽縣知縣隨同署知府驗

明換衣指驗是否於申報後由上司派委抑或另派有同驗之員
總未見該督具奏實屬不以人命爲重草率因循之至且山陽縣
知縣於李清泰領柩時送給路費銀一百五十兩未必不因情節
支離欲借此交結見好希冀不生疑慮又將李毓昌長隨李祥荐
與淮安通判馬連升荐與寶應縣二處李祥等不過同僚廝役何
以俱代爲安置周妥其中難保無知情同謀賄屬滅口情弊此案
或係李毓昌奉差查賑認真稽數查有弊端該山陽縣長其揭報
致死滅口亦未可定或其中另有別情案關職官身死不明總應
徹底根究以期水落石出着吉綸一面將李毓昌屍棺提至省城
派委明幹大員詳加檢驗具奏並著嚴保查明山陽縣並署知府
係屬何人及李毓昌長隨李祥馬連升顧祥山陽縣差胡姓家
人迅速傳集秉公研審如得有確情卽將該府縣嚴參並一千人

證解赴山東歸案辦理若不細心研究致兇手漏網朕斷不容汝
輩無能之督撫惟執法重懲決不輕恕尋諭臧保查明山陽縣知
縣先行解任同一千人證解交刑部審訊○丙子諭近日科道諸
臣尙有章奏而部院大臣都御史副都御史等則寂寂無聞夫人
臣事君之道首在毋欺當嘉謀入告一切毀譽榮辱之念俱不應
存於中惟於國計民生除奸剔弊剴切直陳無有隱諱言行相顧
終始不渝朝廷收讜言之益國家著直臣之效朕實有厚望焉○
戊寅諭軍機大臣會長麟議覆百齡等酌籌民夷交易章程分別
應准應駁具奏所議甚是嗣後各國護貨兵船俱不許駛入內港
夷商銷貨令卽依限回國並令洋商早清夷欠其澳內西洋人不
准再行添屋民人眷口亦不准再有增添引水船戶給照銷照俱
責成澳門同知辦理夷商買辦選擇殷實之人始准承充至向來

夷貨到粵皆由該國自行投行公平交易以順夷情今該督等請
由監督不論股商之商按股籤掣竟似以外夷貨財爲調劑之商
之計事不可行著仍查明舊例妥協辦理○英綸處殺○庚辰諭
前據董誥奏有肥鄉縣知縣萬永福差人投遞稟帖內有奏摺一
封求爲代遞董誥未敢啓封當卽進呈朕閱後因降旨令將該員
解任來京交軍機大臣詢問茲據萬永福稱伊於上年秋差派辦
密雲道路時值大雨屢經修墊際資民力用銀二千兩外仍賒用
銀八百餘兩又天津差務由省派令該縣出大戲十番費銀三千
兩已交藩庫二千兩尙有一千兩未解屢奉文催因思承辦差務
州縣力不能捐辦不能不借用民力聞將來尙有五臺差使道路
較長恐資用民力更多因此冒昧陳奏懇求治罪等語朕躬舉時
巡凡以修國典勤民事原非爲侈遊觀如每年舉行秋獮經過畿

輔各州縣事關綏藩建武時值暑雨途濇卽官民稍效勞費均屬分所應爾至上年巡幸天津省方觀民兼以閱視隄工屢降明諭飭戒疆吏一切繁文糜費槩事損除乃該督等不知仰體朕心沿途設有戲臺點綴等項朕當卽訓斥其非該督等總以自行捐備藉伸忱悃爲辭今據萬永福所言仍係派之各州縣卽肥鄉一縣已派至三千兩則此外各縣所派諒亦大略相仿此皆該省辦差官吏下及官親家丁長隨藉以爲名人人希圖從中沾潤遂不顧貽累地方朕若徹底根究該省大吏豈能當此重咎念其事屬已往姑免嚴辦惟該總督藩司辦理不善不可不加以懲儆溫承惠著拔去花翎褫去黃馬褂方受疇亦著拔去花翎用示薄懲今年朕五旬萬壽卽日啓鑾前赴熱河若該督等再於沿途躉事增華但多見一牌樓添一綵飾必將該督等革職示懲至巡幸五臺尙

未定期卽將來有旨前往設直隸山西途聞有建設戲臺等項點綴者亦必褫革不貸朕言出法隨彼時毋悔萬永福越職言事本有應得之罪念其所言尙正且事有實據著免其治罪加恩發往山西以知縣卽補其肥鄉任內未交銀一千兩並不許再向催交

○辛巳諭昨梁上國告祭回京詢知望祭元太祖元世祖係在德勝門外因令軍機大臣查始自何年茲據查皇朝文獻通考內載順治八年致祭歷代帝王典禮有望祭元太祖元世祖陵在宛平縣北之語順治八年初議致祭歷代帝王典禮其時尙未有暢春園圓明園是以遇有典禮卽在德勝門外望北舉行祭禮此時若仍行照舊則望祭地方轉在御園之南於體制殊覺未協嗣後遇有慶典應致祭元太祖元世祖時著於清河以北昌平州以南仍係宛平縣所轄界內擇地舉行望祭禮著爲令○丙戌諭軍機大

臣等五臺爲曼殊師利成道之地從前 聖祖仁皇帝 高宗純
皇帝屢經巡幸朕前有旨令該撫修治廟宇以俟臨莅原以瞻禮
佛相爲民祈福且其地界處西北蒙古諸部落赴山瞻拜者每
歲絳繹不絕鑾輅經臨瓣香展敬亦寓綏藩之意非以侈遊觀也
昨因直隸辦差糜費已降旨將溫承惠等懲處後年朕巡幸五臺
除廟宇行宮業已次第修整外其途間及山之上一應戲臺雜
伎假山假亭一切點綴槩不准豫備卽廟前斷不准設臺演戲朕
拈香時有喇嘛等在廟前跪接陳設梵樂足備觀瞻至沿途空缺
處所用蓆片搭蓋假山塗飾遮蔽尤爲可厭踴路所經民間村莊
廬舍完整者可以規豐盈氣象其頽垣陋室亦可藉以知民生疾
苦正合省方觀民之義又何必紛紛曲加粉飾乎惟墩汛牌坊以
記疆里可仍其舊不過略加粉飾誌明里數用備省覽該撫務當

仰體朕意崇實黜浮屆期如能辦理妥協不累閭閻朕必加以恩獎若不遵諭旨妄事揣摩彼時見有陳設點綴等項必將該撫等斥革遣戍朕言出法隨斷不寬貸無謂教誡之不早也信此諭是汝之福不信乃汝自作孽彼時必執法辦理將此諭令知之

六月庚寅朔諭本日據慶桂奏發往山西候補知縣萬承福有奏摺一件將原封進呈朕當加披閱所言直省差務事宜俱屬窒礙難行萬承福前次違例投遞奏摺本當治以應得之罪因其所言尙有實據是以特予寬免並加恩發往山西以知縣卽補今復冒昧具摺無論所言差務事宜各條均不可行卽使所言或有可採而該員已發往山西候補卽不應妄論直隸地方事務若以知縣微員俱似此紛紛陳奏尙復成何政體萬承福著交部議處○壬辰以秦瀛爲內閣學士溫汝適爲左副都御史

由通政使遷

○萬承風

以學政任內請開缺來京親謁降內閣學士以秦瀛爲兵部右侍郎

由內閣
學士遷

○乙未諭漕儲爲天庾正供每歲徵收七省漕糧連積

轉運自漕運總督以下分設多官專司其事經大江河湖運道遇

有汎漲淺阻多方疏導需費帑金不下數百萬誠以京師王公百

官祿薪及八旗官兵俸餉胥仰給於此且舟行附載南省百貨若

過行走迅速貨物流通商賈居民咸資其利偶值糧艘中途阻滯

則商船均不得越渡京師百貨亦因以昂貴每年自春徂秋申誠

漕臣疆吏經營催趲不遺餘力是漕糧爲國家重大之務勞費孔

繁乃趨運如此其難而自抵壩貯倉以後該倉場侍郎以及監督

等官均不知慎重職守歷任相沿因循廢弛怠忽疲玩遂至擾和

抵竊百弊叢生前因上年所運北倉米石潮溼蒸變將辦理不善

之倉場侍郎達慶蔣子蒲革懲並將坐糧廳監督等分別降革著

賄旋因清理倉儲特派大臣侍衛等分班盤驗查出虧缺數目其
從前缺收浮出重領偷竊等弊均由此破案歷任倉場侍郎總司
積貯毫無整頓咎無可辭其中雖間有一二素稱明察留心防範
者亦總未能_立出積弊及早剔除亦不過虛有其名毫無實蹟皆
屬誤國負恩必應懲治今奸胥蠹役種種贓私全行敗露自應將
歷任倉場侍郎按照年月久暫及失察弊竇重輕分別懲處見就
該花戶甲斗等供明舞弊年分扣算特令自嘉慶三年以後將歷
任各侍郎職名查明開單進呈除宜興傅森劉秉恬均已病故達
慶蔣予蒲先已黜革懲治外鄒炳泰廣音托津在任較久著交部
嚴加議處薩彬圖德文吳璫李鈞簡任內均有黑箱重領米石之
事失察較重亦俱著交部嚴加議處賈楚克扎布吉倫額勒布在
任均止數月著交部議處和甯到任在一月以上那彥寶不及一

月著交部察議其該倉監督著交部詳查在任年月另行奏明分別懲處○乙巳諭本日係刑部輪班值日止有三名引見官員並未奏事當經召見尙書金光悌及滿漢侍郎等詢以該部因何未有陳奏事件據稱本日係恭寫 神牌吉期若早聞刑部遞指正與書寫時候相值是以未經專摺奏事刑名本章仍照常恭進等語所奏殊屬拘泥該部卽因本日係書寫 神牌吉期或將處決重案暫緩陳奏其尋常事務儘可於早聞奏遞乃率將一切事件全行閱歷甚屬因循疲玩刑部堂官均著傳旨申飭嗣後各部院衙門如再有似此假託避忌貪圖安逸者定行懲處不貸○諭百齡等奏查明登花船難於購料成造仍請添造米艇以期迅速竣工俾資緝捕一摺粵洋緝捕匪船米艇俱有成效前此吳熊光忽以米艇不能遠出外洋請改造登花戰艦二十號往來外洋緝捕

將米艇全行收入內洋防守見經百齡等查明此項船隻所需桅舵大料因須在外番購買是以二年以來未能購得且此時卽購料成造一經風浪掣損將來亦無料換修仍屬不能應用况粵洋縣亘四千餘里止仗此二十船之力在外洋策應捕盜甯不顧此遺彼此皆吳熊光全無主見不過逞其臆度之詞妄思更改而於空言陳奏之外仍無實際斷不可行百齡等見已估計船身價值計其一船所需足造米艇兩隻請將原估登花船二十隻工料銀十五萬四千餘兩改設大中小米艇四十號以期節浮靡而便駕駛所議甚是著卽照所奏辦理又據奏查明東海地方難建營汛一摺遂溪縣東海地方先經吳熊光議請設立參將專營在督撫各標抽兵防守嗣吳熊光又以東海不產甄木奏請停止建營請改募水師添船緝捕今據百齡等查明該處沙土鬆浮建築城堡

礮臺難資經久又與廣州灣遙遙相對以一隅駐守之兵當四面
可通之路亦復難資控制是此事亦不可行吳熊光始則並未詳
細確查繼知事有所難又復回護前議不肯據實奏明更改一味
遷延且如何改募水師添船若干並如何派人管帶之處亦全未
議及殊屬因循聞茸毫無振作茲百齡等請將新造米艇二十隻
專在東海巡防以二十隻在西路洋面策應其配屬巡兵卽於通
省水師按數勻派既可無庸建立營汛亦無庸改募水師其吳熊
光原議裁撤督標後營及提標兵丁之處本與營制不符且陸路
口岸防守緊要斷不可輕議裁革百齡等所見皆是此時應行分
別歸伍撤募之處亦均照所奏辦理至目下粵洋緝捕緊要而水
路營伍均屬廢弛該督等務當振刷精神實力整頓以期設一兵
得一兵之力添一船得一船之用方爲不負委任○丙午諭朕素

聞南糧在途往往盜竄米石並於虧短之後有用藥發漲情弊見
因查辦通倉虧米一案嚴詰已滿倉書高添鳳據稱糧米用藥發
漲多在天津一帶地方其藥名爲五虎下四川等語直隸自安陸
以北道路縣長糧船行走需時必有盜竄之弊著溫承惠卽詳細
挨查勿稍疏縱並著密派能事妥員將賣藥之人一併拏獲將此
藥如何製配係何藥物及平日如何串通舞弊之處徹底訊明據
實奏聞○諭古先聖王重農貴粟國家經久之計首重倉儲天庾
正供顆粒不容短少每歲漕船抵壩起卸歸倉收貯謹嚴按時支
放特設倉場侍郎總司其事該侍郎等經朕委任自當督率所屬
慎重鉤稽進米時不容偷減出米時不容浮溢此外一切弊竇尤
應隨時查察逐處清釐使奸胥蠹役共知畏憚無從措手方爲無
忝厥職乃自嘉慶三年以來歷任倉場侍郎俱各怠玩因循毫無

整頓以致已革倉費高添鳳竟敢在彼盤踞串通甲斗花戶捐典倉書人等一氣把持無弊不作見在研訊之下據該犯等逐層供吐始而多出斛面少收斛面既而乘運送土米出倉之時夾帶好米以致將王貝勒貝子等俸票重支冒領加以鈞扇偷竊甚至私出黑檔蒙混盜領出米尤多作弊尤大而監督等亦復通同舞弊得賄分肥明目張膽毫無顧忌近日甫將白米各廠派員盤驗尙未查竣已虧短至十數萬石之多殊可駭異似此積蠹橫行官吏飢法不知該倉場侍郎所司何事此而不嚴加懲辦何以肅紀綱而釐職守本應一律覈革惟念同時出缺過多且人才實難若槩子擯斥亦覺可惜因命軍機大臣查明各員在任年月並諸色弊竇係起於何人任內詳細開單進呈朕親加覈辦按其任事久暫弊竇輕重分別懲處以示公允不必再交部議除達慶蔣子蒲先

已懲辦外鄒炳泰在任最久於少收多放情弊全無覺察咎有應得姑念其見在吏部辦事尙屬認真且黑檔盜米之弊係在伊離任之後著從寬革去官銜降爲二品頂帶革職留任八年無過方准開復著落分賠賡音在任亦久黑檔盜米之弊係起於伊任內其咎較重且年力已就衰老著降爲三品頂帶卽予休致著落分賠吳璫在任亦久又黑檔出米之弊亦起於伊任內其咎亦重但伊諳練河工自備任南河以來辦事出力朕方欲加之恩獎茲著稍示薄懲吳璫著革去官銜花翎降爲三品頂帶革職留任八年無過方准開復著落分賠李鈞備在任亦久且任內有黑檔舞弊之事出米較多著於服闋後降爲五品翰林著落分賠和甯雖在任未久但任內有黑檔舞弊之事出米亦多伊年齒已老於邊疆重任本非所宜著降補五品京堂著落分賠托津在任一年未能

查出弊竇但黑檔舞弊非伊任內之事著從寬革職留任著落分賠陸彬圖德文雖均在任未及一年但失察黑檔等弊其咎較重均著降補三品京堂著落分賠其餘任內無黑檔舞弊各員貢楚克扎布在任九箇月著於補官日仍帶降三級留任著落分賠額勒布吉綸在任均止五箇月著降二級留任著落分賠那彥寶在任止一箇月著降一級留任著落分賠至福慶許兆椿均有失察黑檔之咎但到任未久卽認真查訪將十餘年積弊據實奏聞一朝破案尙爲留心著加恩寬免處分仍著落分賠其已故之劉秉恬宜興傅森並先經革職之達慶蔣子蒲亦均著落分賠其如何分賠之處將來俟白米各廠盤竣之後交戶部查明確數亦著按照其在任之久暫及任內弊端之輕重分別辦理至秦瀛到任不及一月並無失察之咎著加恩免議免賠○諭軍機大臣等據百

齡等奏接據太平府甯到越南國王阮福映表函並咨呈恩長公文一件內稱南掌國王召溫猛於乾隆六十年錫封後因被伊伯召蛇榮占據未敢歸國自懷敷印流寓越南昭晉州地方十有餘載迨嘉慶十二年召溫猛自詣興化州申訴該國王以敷印不敢存留遣員齎送前來並將召溫猛與家屬送至諒關口候旨等語百齡於接據文表及鈔奉敕誥等件後以事閱多年未便遽將敷印賞還令其歸國可否將原頒敷印先行送京仍飭將召溫猛等在該國境內暫住請旨定奪自應如此辦理召溫猛於乾隆六十年錫封南掌國王後何以播遷在外十有餘年該國於嘉慶五十年兩次遣使進貢俱有印信表文可以查覈其六十年所頒印式見亦令部中詳查除俟查明再行覈辦外著傳諭百齡即將敷到敷印速行送京一面移知阮福映以此事見已奏明大皇帝願

加獎許仍著該國王將召溫猛等留在該國地方暫爲居住所有

齋送到闕原頒敕印見遵旨收繳送京俟到京後大皇帝續降諭

旨再行知照該國王欽遵可也○賞松筠二品頂帶爲陝甘總督

由喀什噶爾參贊大臣選○以胡克家爲漕運總督朱理爲刑部右侍郎由光祿寺

選○調桂芳爲吏部右侍郎轉秀甯爲禮部左侍郎調成格爲禮

部右侍郎以凱音布爲盛京禮部侍郎由內閣學士選○庚戌組布以疾

免以蘇楞額爲工部尙書調福慶爲工部右侍郎轉策丹爲理藩

院左侍郎以蘇沖阿爲理藩院右侍郎由內閣學士選○戊午諭昨江南

省將王伸洪等解到當令軍機大臣會同刑部連日熬訊據王伸

洪供認向李毓昌商量虛增戶口不允欲行稟揭因而謀害又質

之先行到案之李毓昌家人馬通升供亦相符殊堪駭異江南省

竟有如此奇案督撫大員毫無覺察朕知人不明誤用汝輩誠朕

之咎不知汝等尙有何顏上事天子下對萬民地方偶遇偏災國家不惜帑金原以救濟窮黎承辦各員自應激發天良盡心經理實惠及民方不負朕無使一夫失所之意乃邇來不肖州縣多有捏開侵冒私肥己橐其查賑委員貪功分潤者卽與之通同作弊是直向垂斃之饑民奪其口食已屬毫無人心不意山陽縣查辦賑務因委員秉公持正不肯扶同畏其稟揭竟至謀命滅口實爲從來未有之前此鐵保奏稱上年王敬稟報李毓昌自縊時卽疑及李毓昌查賑事竣何以忽至投縊欲提伊家人嚴切查辦嗣據該地方官稟報李毓昌家人馬連升已回山東李祥經王伸漢薦與長洲縣顧祥已回蘇州亦遂不復關查到案詳究根由草率完結可謂軟弱無能汪日章駐紮省垣李祥顧祥俱近在蘇州豈竟毫無聞見亦不查詢乃率據府縣等詳文具題竟似尋常題報

病故之員實屬形同木偶較鐵保之咎尤重試思職官身死不明顯有疑竇該地方官尙相率蒙混不爲究辦若無告窮民衙冤負屈又豈肯盡心推鞠爲之伸理其草菅人命之事不知凡幾矣外省官官相護係向來陋習今官員內有相殘之事不加究詰可見相護者乃狼狽爲奸耳正直之員邪佞豈肯庇護惟有傾陷矣著將申轉李毓昌自縊身死一案各職名查明參奏鐵保汪日章俱著明白回奏汪日章先摘去頂帶並俱著自行議罪俟奏到時候朕降旨亦不必交部議